

Imanol Murua «luxuzko hautagaia» da Gipuzkoako Diputazioan EAren ustez

Diputatu nagusiaren lana goraipatu zuen Garaikoetxeak hautagaiaren aurkezpenean

Eusko Alkartasunak Imanol Murua aurkeztu du Gipuzkoako diputatu nagusi izaten jarrai dezan maiatzeko hauteskundeetan ondoren. «Luxuzko hautagaia» dela Murua adierazi zuen atzo Carlos Garaikoetxea, EAko lehendakariak, eta gipuzkoar instituzioak egindako lana goraipatu zuen.

PANTXIKE AGIRRE / DONOSTIA

«Luxuzko hautagaia» dela Imanol Murua adierazi zuen atzo Carlos Garaikoetxea. EAk Gipuzkoako Diputazioarako hautagai nagusi aurkeztu zuen Murua eta aurkezpen horretan Garaikoetxea, alderdiko lehendakariak esan zuenez, «gizon zuhur, efikaz, konziliatzaile eta bere herrian sustraizakoa» da Imanol Murua eta horregatik hautagai onena hurrengo legealdian ere gipuzkoar instituzio honetako buru izateko.

Imanol Muruak Gipuzkoako diputatu nagusi izaten jarraituko duela espero du EAk. Bera buru izan duen gobernuak «armonia eta kohesioa» erakutsi duela adierazi zuen Garaikoetxeak. EA-EEren gobernu gestioa positiboki baloratu zuen eta «leialtasun instituzionala» agertu duela azpimarratu zuen.

Irutzun-Andoain autobideak sortu duen auzia dela eta, Muruak eta bere gobernu taldeak «arazo handi bati egin behar izan diote aurre», esan

zuen Garaikoetxeak. «Norbaitek biolentziaren kontrako jarrera gauzatu baldin badu, Imanol Murua izan da» adierazi zuen hautagaitzaren aurkezpenean EAko lehendakariak. «Biolentziak konfrontazio politikoa» ekarri duela uste du Garaikoetxeak eta horri aurre egiteko gakoa «biolentziaren alde dauden sektore sozialegan garaipen politikoa» lortzea dela gaineratu zuen.

«EKOLOGIARI ATENTZIO BEREZIA»

Autobidearen gaiari lotuz, Gipuzkoako Diputazioako gobernu taldeak ekologia eta ingurugiroarekiko atentzio berezia izan duela adierazi zuen Carlos Garaikoetxeak. Irutzun-Andoain autobidean aurrera egiteko ingurugiro eta ekologia ikerketa sakonak egin direla azaldu zuen. «Leizarango autobideak ekarriko lituzkeen kostu ekologiko eta ekonomikoak inoiz ez bezala aztertu ditu Muruak eta baita EA alderdiak ere» gaineratu zuen.

Imanol Murua diputatuak bere aldetik, Irutzun-Andoain autobideko lanak lehenbaitlehen hastea desio dutela, baina noiz izango den ezin duela ziurtatu adierazi zuen.

Gipuzkoako Diputazioak EAEko beste instituzioekin izan dituen «harreman estu eta onak» azpimarratu zituen bait ere Imanol Muruak. «Ez EA eta ezta EEk ere, ez dugu Eusko Legebiltzararekin konfrontazioa sortzeko Diputazioa erabili» gaineratu zuen. Bere ustez, EArentzat zaila izan da Gasteizen oposizioan egotea eta Gipuzkoan gobernuan,



Imanol Muruak orain artekoa jarraitzea eskaini zuen aurkezpenean.

EFE

✓ «Irutzun-Andoain autobideko lanak lehenbaitlehen hastea desio dut, baina noiz izango den ezin dut ziurtatu. Ahal izango banu, ni neu jarriko nintzateke horretan».

baina «jokoaren arauak betez kontsentsua egon da Jaurilaritzarekin» gaineratu zuen.

EAren Asanblada nazionalak larunbatean eztabaidatuko du zein izango duen EAk aurkeztuko duen programa, baina «orain arteko ildotik jarraitzea» espero du Muruak, «Gipuzkoa modernizatuz, eta ahal izanez gero indar handiagoz». EA azken hauteskundeetan Gipuzkoan

izan zituen emaitzak gordetzen baitu, ez dela autobidearen gaiari esker izango uste du Imanol Muruak. Jauregi susmo hori azalduz egin zituen adierazpenak honelak erantzun zituen diputatu nagusiak: «ona da EAk orain arte bezala jarraituko duela pentsatzea, baina horrela bada ez da autobidea dela eta izango, gaur asko egin ditugulako Gipuzkoan eta jendea horretaz ohartu delako».

Garmendia ordezkatzek piztu egin du EEko sektoreen gatazka

Z. ZAMAKOLA / BILBO

Xabier Garmendiaren parlamentari kargua ordezkatzek EEko 'Añamendi' eta 'Berriztapen Demokratikoa' sektoreen arteko gatazka larritu egin du, Biltzar Ttipiaren (BT) ustearen aurka Igone Arteagabeitia 'Añamendi' aldekoak eskuratu bait du eserlekua.

Garmendia kontseilariorde izendatuta, parlamentari kargua utzi behar izan zuen, inkompatibile izateagatik. Horren aurrean, Biltzar Ttipiak bilera gatazkatsuan —partaideetako batzuk irten ere egin ziren bozketa ez zutelako onartu— Jon Larrinagaren usteari jaramon eginez, zerrendan hurrengo zen Igone Arteagabeitia 'salto' egin eta Jose Luis Lizundia hautatu zuen parlamentari kargua eskuratzeko.

Hurrengo egunean, berriz, Igone Arteagabeitia kredentzialak aurkeztu zituen Parlamentuko mahaian eta eserlekuaren jabe egin zen. Bere esanetan, ez zuen kargua BTaren erabakiaren aurka hartu «erabaki gabeko aholkua izan zelako eta nik neure eskubidea erabili dudalako». Arteagabeitia ez zuen bidezko ikusi

bozketa ematea BTn, «aurrekin arriskutsua delako» eta erabaki horrek BTren erdiaren eritzia ez zuela jaso azpimarratu zuen (90 kide izanik 44 botu izan zituen).

«BERMA BATZORDEAREN ESKU»

Jose Luis Lizundia 'Berriztapen Demokratikoa' aldekoak, berriz, Arteagabeitia «alderdiaren erabakiaren aurka» jo zuela eritzi zion, eta Xabier Markiegi alde berekoak bere aldetik, afera «Berma Batzordearen esku» zegoela esan zuen.

Berma Batzordea EEren barruko aferak erabakitzeko egitura da, eta norbaitek bertara jota baino ez du erabakirik ematen. Egitura honen azken erabakia Kizkur Ezkauriatza eta J. Nikolas alderditik kanporatzea onartzea izan zen. Arteagabeitia kargua ez duela utziko ziurtatu zuen «jarrera berdinean planteatzen badute», eta «harrigarria» eritzi zion Larrinagaren proposamenari. «Ematen du exekutiba osatuta, bide bat zabaldu dela ezberdintasunak lasaitu eta elkarrekin lan egiteko. Orduan hori planteatzea zaurian ibiltzea dela ematen du», esan zuen.

Urrutikoetxeak eta Arrospidek abokatu berria aukeratu dute

P.U. / DONOSTIA

Jose Antonio Urrutikoetxea Bengoetxea eta Santiago Arrospide Sarasola, Frantziako Fresnes gartzelan preso dauden ETAko kideek abokatu berria aukeratu berri dute. Urrutikoetxeak eta Sarasolak Claire Freyssinet abokatuari jakin erazi diote azken hamabost egun hauetan, bere abokatua izatea nahi dutela, Freyssinet abokatuak berak EGUNKARIARI baieztatu dionez.

Claire Freyssinet abokatuak, Jon Gonzalez abokatu zuberotarrarekin batera, euskal errefuxiatuen auzietaz, arduratzen da aspaldi honetan.

Abokatu berrien eskakizun hau beste euskal preso politiko batzuren gehitu behar zaie eta Cristianne Fando abokatuarekin izandako arazoak direla medio etorri dira. Dena dela, Claire Freyssinetek ezin zuen atzo baieztatu ala ezeztatu Urrutikoetxeak eta Arrospidek Cristianne Fandoren zerbitzuei uko egin diz-

kieten ala ez. Kasu honetan, teknikoki ezin da errefusaketaz hitz egin, baizik eta, izatetektan, abokatu aldatetaz. Orain arte, Frantziako gartzelatan dauden euskal presoek ez dute jarrera hauen azalpenik eman.

Jose Antonio Urrutikoetxeak eta Santiago Arrospidek ez dute hemendik gutxira judizi prozesurik, biek hamar urtetako gartzela zigorra ari bait dira betetzen. Zertzelada hauek esanahi berezia emango liokete abokatu aldatetari, Fando abokatuarekiko urruntzea azpimarratuz.

Fando abokatuarekiko urruntze hau azaldu zen Zabaleta Elosegik, preso zegoela, aipatu abokatua errekusatu zuenean. Orduan, atxilotu berriek Jon Gonzalez eta Freyssineten taldearen zerbitzuak eskatu zian dituzte eta beste prozesatu batzuk abokatuak aldatzea eskatu dute. Aldaketa hauek «hausturarik gabe» ematen ari direla adierazi dio egunkari honi Jon Gonzalez abokatuak.

Nazionalitateei buruz Gebarak aurkeztu zuen txostena onartu dute Europar

STRASBOURG

Juan Ramon Gebarak Nazionalitateen Kanpo Harremanei buruz aurkeztutako txostena onartu egin du Europako Kontseiluko Botere Lokal eta Erregionalen Konferentziak. Gasteizko Jaurilaritzako Lehendakaritza sailburu ohiak atzo Strasbourg-en aurkeztutako txostenak zenbait gomendio egiten da eta baita neurri zehatz batzu proposatu ere.

Nazionalitateek kanpora begira lan egiteko duten eskubidea garrantziaz eskatzen du Gebararen lanak eta erregio arteko kooperazio hitzarmen bat proposatzen du.

Strasbourgen atzo hasi zen konferentziak Juan Ramon Gebararen azalpena txalotu eta eskertu zuen. Europaren eraikuntzan nazionalitate eta erregioek duten papera eta garrantzia defendatu zuen sailburu ohiak. Bere lanaren aurkezpen eta onarpenarekin Gasteizko sailburu ohiak nazioarteko aditu talde batekin egin duen lanari amaiera eman zaio.

Kooperazio erakundeentzako nortasun juridikoa ziurtatzeko neurriak eskatzen du 'Gebara txostenak'. Nazionalitateek Europar Kontseiluan duten ordezkaritza handiagoa izan behar duela dio.

Nazioarteko akordioak izenpetzerakoan erregioak kontsultatu daitezkeen eta era berean parte har dezaten eskatu beharko litzaiekela Estatuiei uste du Gebarak.

HB: «Juan Carlos Erregea, pertsona 'non grata'»

BILBO

HBko Mahai Nazionalako batzorde iraunkorrak Espainiako Erregeak Euskal Herrira egin dezakeen bisitaldia aztertu zuen atzo, beste zenbait gaien artean.

Honi buruz, HBko iraunkorrak zioen, bisitaldia «ez gustokoa eta gogorik gabekoa» zela Euskal Herriaren gehiengo nagusiarentzat, atzo igorri zuen ohar baten bidez. Ildo beretik, HBk herri protesta posibleak aztertu zituen «Euskal Herriko hiritarrek Juan Carlos Erregeari 'non grata' eritzi adierazi ahal izateko».

«Zuzendaritza egitura honen ustez —dio oharra—, Espainiako koroak Euskal Herriaren mendetako zapalkuntza eta Burujabetasun Politikoa-aren ukapena sinbolizatzen ditu eta Juan Carlos Erregeak estatuaren batasun zatiezinen balore zapaltzaileak ordezkatzeko, bere etorkizuna aske erabakitzeko gogoia aldarrikatu eta desio duen herri baten eskubide demokratiko eta bidezkoen aurrean».

Udal hauteskundeetako buruz eta Herri Programaren baitan, bestalde, HBko egitura honek programa eta hautagaiak zehazteko iradokizunetan «herri erantzun garrantzitsua» izan zuen, oharrean arabera.

Azkenik, HBk iragarri zuen laster kaleratuko direla hauteskundeetarako programak eta hautagaien zerrendak.